

QVestion de Chirvrgie.

Pour estre disputee en l'Estude de Monsieur le Vasseur Docteur Regent en la faculté de Medecine de Paris, & Lecteur ordinaire en Chirurgie.

Le Chirurgien doit il entreprendre la guerison des os descouverts, ausquels est suruenu Erysipele?

I.

POVR chasser les maladies & y apporter vn remede assure, il est necessaire d'auoir tout à propos; en vain le Chirurgien s'y oppose à qui la nature est entiere-ment contraire, si le corps languissant, son subiect remply d'impuretez, sources, & origines des plus grands maux, s'aigrit à ses soins, en vain applique-il des medicamens s'ils augmentent le mal qu'il entreprend de guerir: c'est inutilement qu'il tasche à secourir & reuestir les os descouverts, s'il y suruiuent erysipele, il a en ce rencontre non seulement à combattre la nature opiniastre, mais encores tous les symptomes qui y peuuent arriuer au mespris mesme & du fer & du feu.

II.

TOUS les os, exceptez les dents, sont naturellement couverts, ou de chair, ou de membrane & de cuir, tous sont subjets aux mesmes iniures que le reste du corps; de plus, ils se fendent, ils se brisent, ils se percent, ils se froissent, changent de lieu, se descouurent, s'enflamment, deuiennent liuides, se pourrissent & abscedent. Toutes ces affections sont incurables, il n'y a que les dislocations & nuditez à qui on puisse remedier: & si à cette derniere, comme il aduiuent souuent, il s'y trouue erysipele (qui est vne ardeur vehemente qui de soy s'espand par toute la superficie du corps, ne s'esleuant point en tumeur apparente dessous la chair, mais s'estendant au large sans se terminer par aucun amas de matiere) c'est où le Chirurgien suë, c'est là le nœud qu'il ne peut defaire, soit que les os soient descouverts, ou par contusion, pourriture, mortification ou erosion de la chair & de la membrane, ou par la carie des os. Sur quelque partie que l'erysipele se iette, elle la brulle & la ronge avec violence, elle y cause vne nouvelle fluxion bilieuse prouenant de l'impureté dont la partie de l'os descouvert abonde, la fluxion elbranlée est suivie d'un frissonnement & d'une fièvre; il la faut guerir & ester auant que de songer à la guerison de l'os, & qu'il puisse s'y faire nouvelle chair, qui est vn œuvre impossible tant de la part de l'art, que de la nature.

III.

OS ne se descouure iamais si ce n'est par vne grande vlcere: l'vlcere se fait d'humeur acre, ce qui est excité par vne humeur acre & mordicante ne se guerit point; l'erysipele est de ceste nature, c'est vne humeur purement bilieuse ou meslée avec le sang, qui s'affermissant peu sur le cuir, s'imprime avec plus de violence & plus profondement dans la chair, elle la mange, la corrompt, ou cause vne suppuration & pourriture tres-dangereuse, plustost que de la rengendrer; la chair enflammée, l'os conçoit la flamme & se rend communes toutes les maladies de la chair, la nature estant affoiblie; les medicamens n'y peuuent rien, les resolutifs eschauffent & attirent vne nouvelle fluxion sur les os des-jà impurs & disposez à la recevoir, tout se ronge, tout se pourrit, & en fin deuient en abscez; les remedes benignes mis seulement pour adoucir, empeschent la cicatrice, ils rendent l'vlcere sale, & sordide, les detergents, l'augmentent par leur acrimonie, les froids luy sont contraires, & le feu qui semble le seul remede destruit tout, & le rend deplorable.

Le Chirurgien ne doit donc entreprendre la guerison des os descouverts ausquels est suruenu erysipele.



*A ces presentes Theses respondra publiquement (Dieu aydant) Antoine Rolland, Lieutenant des Escoliers estud. ans en Chirurgie, le Dimanche 14. iour de Juillet 1641.
à vne heure precise, en la rue de la Verrerie proche l'Assurance chez Monsieur Damon.*